

МЕСЯЦА ДЕКЕМВРИЯ В 9-Й ДЕНЬ.

ЗАЧАТИЕ СВЯТЫЯ АННЫ, ЕГДА ЗАЧАТ ПРЕСВЯТУЮ БОГОРОДИЦУ

НА МАЛОЙ ВЕЧЕРНИ

На Господи, воззвах: стихиры на 4, глас 2:

Киими недостойными устнами * восхвалим ныне заченшуюся Святейшую твари * и Честнейшую суци Херувимов и всех святых, * престол царский недвижимый, * дом, в нем же вселися Вышний, * Спасение мира, Божие Священие, * подающу верным, в святем зачатии Ея, мир и велию милость?

Кая духовная пеня * ныне принесем Ти, Всесвятая? * еже бо в неплодней * Твоим зачатием весь мир осватила еси, * и Адама от уз избавила еси, * и Еву от болезни свободила еси. * Темже ангельстии лица спразднуют, * Небо и земля радуются, * и совосплещут души праведных, * песни верно взывающи * во славу зачатия Твоего.

Кая страшная пеня, * яже принесоша Ти тогда, Дево? * Окрест зачатия Твоего * отроковицы радующаяся и со страхом вопиюща: * зачатся палата Царева, * возсияет кивот священия, * двери неплодныя отверзаются, * Божия бо дверь благочадие добродетелей вводит, * подающи мирови мир и велию милость.

Слава, и ныне, глас тойже:

Днесь из корене Давидова * царская порфира прозябши, * от Иессея израстити начинает цвет таинственный * в Нейже Христос Бог наш прозябе, * спасаий души наша.

На стиховне стихиры, глас 2.

Подобен: Доме Евфрафов:

Лик пророческий, радуйтесь: * се бо Анна прозябает Плод, * Имже пророчества ваша * исполнитися произыдут.

Стих: Клянется Господь Давиду истиною * и не отвержется ея.

Срадуйтесь, колена вся, * неплодней Анне: * яко Плод чрева * паче надежды прозябает, * живота нашего Ходатаицу.

Стих: От плода чрева Твоего * посажду на Престоле Твоем.

Концы земнии, * веселитесь: * се бо Творца всех Матерь * от неплоднаго чрева * прозябает днесь.

Слава, и ныне, подобен тойже:

Радуйся, Иоакиме, * и Анно, радуйся: * яко спасения Ходатаицу * и радость мира, * плодоносите днесь.

Тропарь писан на велицей вечерни.

НА ВЕЛИЦЕЙ ВЕЧЕРНИ

На Господи, воззвах: стихиры на 6, глас 4.

Подобен: Званный свыше:

Плодородящи неплоды паче надежды * Деву, хотящую родити Бога плотию, * радостию светится и ликует, радующийся, * велегласно взывающий: * колена вся, срадуйтесь мне, Израилева. * Се во чреве ношу * и поношение безчадства отлагаю, * якоже благоизволи Содетель, * услышав молитву мою, * и болезни сердца исцели * в желаемых ми.

Иже от немокренна, камене * источивый воду, * плод чреву твоему, Анно, * дарует, Приснодеву Владычицу, * из Неяже вода спасения хочет произыти. * Нектому, яко неплодная земля, * пребудеши на земли, * поношение отчуждила еси: * Землю бо возрастивши, плодоносящу Жизни Клас, * поношения отъемлющий всем человеком, * якоже благоизволи * за милосердие милости вообразитися в чуждее.

Пророческая речения ныне исполняются: * гора бо Святая в ложеснах водружается; * лествица Божественная насаждается; * престол великий Царев проуготавливается; * место украшается Боговходимое; * Купина Неопалимая начинает прозябати; * Мироположница Святыни уже истекает, * неплодствия реки простирающии Богомудренныя Анны, * юже верою ублажаем.

Слава, и ныне, глас 2. Германово:

Недоведомое Ангелом и человеком великое, * еже от века сокровенное таинство преславное: * днесь в ложеснах целомудренныя Анны * младоносится Мария Богоотроковица, * уготовляема во вселение всех Царя веков * и во обновление рода нашего. * Юже чистою совестию умолим, вопиюще к Ней: * моли Сына Твоего и Бога, * яко предстательница сущи нас христиан, * спасти души наша.

Вход. Прокимен дне. И чтения.

Бытия чтение (глава 28):

Изыде Иаков от студенца клятвеннаго и иде в Харрань. И обрете место, и спа тамо, зайде бо солнце, и взят от камня места того, и положи возглавие себе, и спа на месте оном, и сон виде: и се лествица утверждена на земли, еяже глава досязаше до небес, и Ангели Божии восхождаху и нисхождаху по ней. Господь же утверждашеся на ней, и рече: Аз Бог Авраамов, отца твоего, и Бог Исааков, не бойся, земля, идеже ты спиши на ней, тебе дам ю и семени твоему. И будет семя твое, яко песок земный, и распространится на море, и ливу, и север, и на востоки. И возблагодарятся о тебе вся колена земная и о семени твоём. И се Аз с тобою, сохраняяй ты на всяком пути, аможе аще пойдеши. И возвращу ты в землю сию, яко не имам тебе оставить, дондеже сотворити Ми вся, елика глаголах тебе. И воста Иаков от сна своего и рече: яко есть Господь на месте сем, аз же не ведех. И убояся, и рече: яко страшно место сие, несть сие, но дом Божии, и сия врата небесная.

Пророчества Иезекиилева чтение (главы 43 и 44):

Тако глаголет Господь: будет от дне осмаго и прочее, сотворят иереи на олтари всесожжения вашего и яже спасения вашего, и прииму вы,— глаголет Адонаи Господь. И обрати мя на путь врат святых внешних, зрящих на востоки, и сия бяху затворена. И рече Господь ко мне: врата сия затворена будут и не отверзутся, и никтоже пройдет сквозе их, яко Господь Бог Израилев пройдет ими, и будут

затворена. яко игумен сядет в них снести хлеб, по пути Еламских врат внидет и по пути его изыдет. И введе мя по пути врат святых, сущих к северу, прямо храму, и видех, и се исполнь славы храм Господень.

Притчей чтение (глава 9):

Премудрость созда себе дом и утверди столпов седмь. Закла своя жертвенная, и раствори в чаши своей вино, и угодова свою трапезу. Посла своя рабы, созывающыи с высоким проповеданием на чашу, глаголющи: иже есть безумен, да уклонится ко мне, и требующим ума рече: приидите, ядите мой хлеб и пейте вино, еже растворих вам. Оставьте безумие, и живи будете, и взыщете разума, да поживете, и исправите разум в ведении. Наказуяй злыя, приимет себе безчестие, обличаяй же нечестиваго, опорочит себе, обличение бо нечестивому – раны ему. Не обличай злых, да не возненавидят тебе, обличай премудра, и возлюбит тя. Дажь премудрому вину, и премудрший будет, сказуй праведному, и приложит приимати. Начало премудрости – страх Господень, и совет святых – разум. Разумети бо закон – помысла есть благаго, сим бо образом многое поживеши время, и приложатся тебе лета живота.

На литии стихиры, глас 1:

Веселитесь, праведнии Богоотцы, Иоакиме и Анно, днесь, * вы бо пронареченны бысте от всех родов * быти родителии рождшия плотию Единороднаго Сына Божия * Марии, Неискусомужныя Богоматере, * и конец подати Тоя ради всем знамениям же, и тайнам неизреченным, * и проречением пророческим, * таинству Слова воплощения. * Веселися и ты днесь, пророческий личе, * со Давидом и Авраамом праотцы, * прииде бо слава проповедания вашего * и всемирное избавление.

Глас 2:

Днесь Облак светел * в невлажной утробе составляется, * от него же Солнце Правды, Христос Бог наш, превыше естества возсияет * просветити во тьме и сени смертней сидяция * и всем даровати велию милость.

Глас 6:

О чудес преславных! * О вещей преестественных! * Ангел с Небесе всечестному союзу рождение Богородично предвозвещает, * и неродяция неплоды плодоносит Богоотроковицу, * изсохшая же утроба затворенную Вышняго дверь прозябает, * именование безчадных супругов * в Богоотец тезоименитство преложиши благочадия ради. * Темже возопиим: * Иже вся содеваяй и точию хотением пременяяй, * Господи, слава Тебе.

Слава, и ныне, глас 5:

Радуйся и веселися, Анно, Богом почтенная, * яко от обещания плодоносиши * от Ангела радость приимшую * и от нераждающия утробы прозябаеши * от безсеменныя утробы прозябшую Садоделателя всех. * Блажен дом, от него же родися; * блаженный корень воистинну, * из негоже произыде; * блаженный Плод родителей, из нихже произведеса. * Радуйся со Иоакимом Богомудрым: * вы бо Божественным манием родителии воистинну показастеса * единыя в женах Благословенныя Девы и Богоматере.

На стиховне стихиры, глас 5.

Подобен: Радуйся:

Анна, Божественная благодать, * иногда молящися о чаде, * возопи всех Богу и Зиждителю: * Адонаи Саваоф, безчадия веси поношение, * Сам болезнь сердца моего разреши, * и хляби утробныя разверзи, * и неплодную плодоносну покажи: * яко да раждаемое * дар Ти принесем, благословяще, * поюще и единомудренно славяще Твое благоутробие, * имже миру дается велия милость.

Стих: Клятсѧ Господь Давиду истиною * и не отвержется ея.

Древле молящися верно Анна целомудренная * и Бога умоляющи, * Ангельский глас услыша, * известующий ей просимых Божественное событие. * К нейже безтелесный явственнo беседоваше: * моление твое бо Господу приближися, * не сетуй и от слез отступи, * благоплодна бо будещи маслина, * прозябающи ветвь красную – Деву, * яже цвет процветет Христа плотию, * подающаго миру велию милость.

Стих: От плода чрева Твоего * посажду на престоле Твоем.

Супруг плодородит честен Божественную Юницу, * из Неяже пройдет Телец, * неизреченным словом упитанный воистинну, * за весь мир закалаемый. * Тем, радующеса, * исповедание непрестанное во умиление Господеви приносят * и всяческая пользующую имети будут. * Сия убо да ублажим * и верою ликовствуим в зачатии Божественне, * яже от них Бога нашего Матере раждаемья, * Еюже дается богато велия милость.

Слава, и ныне, глас 2:

Днесь из корене Давидова * Царская порфира прозябши, * от Иессея израстити начинает цвет таинственный, * в Нейже Христос Бог наш процвете, * спасаяй души наша.

Тропарь, глас 4:

Днесь безчадия узы разрешаются, * Иоакима бо и Анну услышав, Бог * паче надежды родити тем яве обещавает Богоотроковицу, * из Неяже Сам родися Неописанный, Человек быв, * Ангелом повелев вопити Ей: * радуйся, Благодатная, * Господь с Тобою.

Сей тропарь глаголется без Богородична.

НА УТРЕНИ

На Бог Господь: тропарь трижды. глас 4:

Днесь безчадия узы разрешаются, * Иоакима бо и Анну услышав, Бог * паче надежды родити тем яве обещавает Богоотроковицу, * из Неяже Сам родися Неописанный, Человек быв, * Ангелом повелев вопити Ей: * радуйся, Благодатная, * Господь с Тобою.

По 1-й кафизме, седален, глас 1.

Подобен: Лик Ангельский:

Новое Небо во чреве Анны зиждется * Бога Вседетеля повелением, * из негоже возсияет Невечернее Солнце, * мир весь просвещающее лучами Божества, * премножеством благоутробия, Един Человеколюбец.

Слава, и ныне, тойже.

По 2-й кафизме, седален, глас 8 и подобен тойже:

Лик пророческий проповеда древле * Непорочную Чистую и Богоотроковицу Деву, * Юже Анна зачат, неплоды сущи и безчадна; * Сию днесь веселием сердца ублажим, спасшеся Ея ради, * яко Едину Непорочную.

Слава, и ныне, тойже.

Величание:

Величаем Тя, Пресвятая Дево, и чтим святых Твоих родителей и всеславное славим зачатие Твое.

По полиелеи седален, глас 4:

Возопий, Давиде, что клятся тебе Бог? * Яже не клятся, рече, и исполни уже, * от плода чрева моего давай Деву, * из Нея же Содетель Христос, новый Адам, родися, * Царь на престоле моем, * и царствует днесь, имеяй царство недвижимо. * Неплоды зачинает Богородицу * и Питательницу жизни нашея.

Степенна 1-й антифон 4-го гласа.

Прокимен, глас 4: От плода чрева твоего * посажду на престоле твоём.

Стих: Помяни, Господи, Давида и всю кротость его.

Евангелие от Луки, зачало 4.

Во дни оны, воставши, Мариам, иде в горняя со тщанием, во град Иудов. И вниде в дом Захариин, и целова Елисавет. И бысть яко услыша Елисавет целование Мариино, възграся младенец во чреве ея, и исполнися Духа Свята Елисавет. И возопи гласом велиим, и рече: благословена Ты в женах, и благословен плод чрева Твоего. И откуда мне сие, да прииде Мати Господа моего ко мне? Се бо, яко бысть глас целования Твоего во ушню моею, възграся младенец радощами во чреве моем. И блаженна Веровавшая, яко будет совершение глаголаным Ей от Господа. И рече Мариам: величит душа Моя Господа, и возрадовася дух Мой о Бозе Спасе Моем. Яко призре на смирение Рабы Своея, се бо, отныне ублажат Мя вси роди. Яко сотвори Мне величие Сильный, и свято имя Его. Пребысть же Мариамъ с нею яко три месяцы, и возвратися в дом Свой

Слава: Молитвами Богородицы: или Слава, глас 8:

Радуйся, естество человеческое, * добродетельми прежде неплодствующее, * неплоды бо ныне зачинает * неплодствия твоего Разрешение.

И ныне, тойже.

По 50-м псалме стихира, глас 6:

Начаток спасения нашего, людие, днесь бысть, * начинается убо Дева Мариам * и зиждется во утробе неплодныя, * и мир с нею обновляется. * Веселится Иоаким со Анною, * неплодствия разрешися, * и Адам радуется, от уз свободяемь. * С ним же и мы радостно к Ней возопиим: * радуйся, Обрадованная, Господь с Тобою.

Канона два святых Анны: 1-й со ирмосом на 8, 2-й на 6, глас 1. Творение Андреево.

Песнь 1

Ирмос: Песнь победную поим вси Богу, * сотворшему дивная чудеса мышцею высокою * и спасшему Израиля, * яко прославися.

Зачатие днесь, Богомудрая Анно, твое празднуем, яко Вместившую нигдеже Вместимаго зачала еси, неплодных отрешшися уз.

Праведных услышал еси молитву, святых исполнил еси обещание, Господи, праотец Твоих и сим дал еси плод Тебе рождшую, Чистую.

Анна славная ныне зачинает Чистую, безплотнаго заченшую Господа Препллагаго, и родити имать плотию имущую родити Христа.

От тленных возсияла еси, Дево, ложесн; в нетленне бо чреве славы Солнце носила еси, бывша, якоже есмы, кроме вращения и смешения.

Другий канон, глас тойже. Егоже краегранесие по алфавиту.

Песнь 1

Ирмос: Христос рождается – славите! * Христос с Небес – срящите! * Христос на земли – возноситеся! * Пойте Господеви, вся земля, * и веселием воспойте, людие, * яко прославися.

Чистую Деву Богоотроковицу, Матерь быти хотящую Создателя, во чреве приемши Анна, радостно вопияше: колена вся Израилева, срадуйтеся мне, се бо и аз зачах.

Книгу, юже прорече пророк, запечатану Духом Божественным, в ложеснах своих содержащи, Анна всем вопияше: Юже вся Списания проявляют, возвеличаюся аз, прозябающи днесь.

Во чреве вмещается и создается храм Божественный и спасительный, в ложеснах матерних насаждается Лествица, яже к Вышним вся человеки возводящая. Еяже зачатие верно да торжествуем.

Катавасия: Христос рождается:

Песнь 3

Ирмос: Да утвердится сердце мое в воли Твоей, Христе Боже, * Иже над водами Небо утверждей второе * и основавый на водах землю, Всесильне.

Плод чрева аще подаси мне,– вопияше Анна ко Господу,– возвеличуся и Тебе принесу сей. Сего ради зачинает Чистую Богоматерь.

Яже по закону скончавши и Богу непорочно работавши, чревоносиши воистинну Законодавца рождшую, Анно всечестная, темже тя, вернии, ублажаем.

В саду молящейся тебе, глас услыша высочайший, Анно Богомудрая, и плод чреву Твоему дает— рая Отверзшую дверь благодатию.

Богородичен: Неплодствующия мысли моя неплодие всякое отжени и плодоносна добродетельми душу мою покажи, Всесвятая Богородице, верных помощи.

Ин

Ирмос: Прежде век от Отца рожденному нетленно Сыну * и в последняя от Девы * воплощенному безсеменно, * Христу Богу возопиим: * вознесый рог наш, * Свят еси, Господи.

Приемлет с высоты моляйся Господу Иоаким вожделенное вещание, представшу Ангелу ему и глаголющу: отыди, твоя прошения, праведне, всех Бог исполни.

Призывающи всех Бога, Анна иногда в саду стоящи, представша зряше себе Ангела и глаголюща: да не скорбиши, Матери бо Божией мати имаши быти.

Ревнующи Анне, сущей прежде тебе, моления к Богу принесла еси и, безсеменно приемшую Слово Невместимое, Чистую во утробе зачала еси, благочадием твоим вся ны, Анно, облагодативши.

Седален, глас 4.

Подобен: Вознесыйся:

Иоаким священный и Анна дар принесоша древним священником * и не прияти быша, неплоды сущи, * мольбу принесоша Дателью всяческих, * и, молитву их услышав, дарует им суцо Дверь Жизни, * Еяже святое почтим зачатие.

Слава, и ныне.

Подобен: Удивися Иосиф:

Нескверная Агница и Пречистый Чертог * от праведников произыти ныне начинает, вернии, Богоукрашенная Мария преславно. * Веселитесь прочее, Небо и земля, * и вси земнороднии, созыграйте: * яко сотвори днесь преславная Бог, * во чреве, неплодствующия плод, едину показав Деву, * Юже верно воспоем.

Песнь 4

Ирмос: Духом провидя, пророче Аввакуме, Словесе воплощение, * проповедал еси, вопия: * внегда приблизитися летом – познаешися, * внегда приити времени – покажешися. * Слава силе Твоей, Господи.

О, Божественнаго вещания! О, страннаго глаголения! аще и аз зачну. Ангелу к ней пославшуся, Анна, удивляющися, велегласно вопияше: Богу моему слава, творящему преславная.

Срадуйтеся мне, вся племена Израилева: во утробе зачах новое Небо, из негоже Звезда возсияет помале спасения – Иисус Светодавец,— Анна, радующися, взываше.

Услыша Аннино Бог стенание, и внят Господь молитве ея и, безчадия облак разорив, светом озаряет благочадия преславно. Темже зачинает Едину Чистую.

Богородичен: Дево Богородице, нескверная скиние, оскверненнаго прегрешеньми очисти мя ныне щедрот Твоих чистейшими кропелньми и даждь ми руку помощи, да зову: слава Тебе, Чистая Богопрославленная.

Ин

Ирмос: Жезл из корене Иессеова * и цвет от него, Христе, * от Девы прозябл еси, * из горы, Хвальный, приосененныя чащи * пришел еси, воплощся от Неискусомужныя, * Невещественный и Боже, * слава силе Твоей, Господи.

Отверзется утроба твоя, яже прежде нераждающая, и приемлещи, Анно, Облак Небесный, из негоже нам светлое, возсияв, Солнце вся светом истины озари и глубокую тьму безбожия отгна.

Престол огнеобразный Божий в ложеснах Твоих водрузися, на немже сед, воспочи, и всех благочестивых труд отъят, и чистое Богознание водрузи на земли, Анно блаженная, Богоприятная.

Се, Егоже прорече Соломон, во утробе Одр прияла еси, сохраняемь истиннейше Истинному Царю к Божественному воззванию, рода человека обращению, темже ты радостно, Анно, вернии, ублажаем.

Песнь 5

Ирмос: Твой мир даждь нам, * Сыне Божий: * иного бо, разве Тебе, бога не знаем, * Имя Твое именуем, * яко Бог живых и мертвых еси.

Из корене прозябшая Давидова и Иессеева, Анна ныне растити начинает Божественный Жезл, прозябший таинственный Цвет— Христа, всех Зиждителя.

Матерь бывшую мя,— Анна вопияше,— узрят людие и учудятся: се бо рожду, яко благоволи соузы Разрешивый неплодствия моего.

Отроковицу, Юже зачах аз, пророчестии гласи издалеча провозвестиша, гору и дверь непроходную,— прерадостно Анна вопияше приходящим.

Богородичен: Облак, и рай, и дверь Тя Света, трапезу, и руно вемы, и стамну, внутрь манну носящую, сладость мира, Чистая Дево Мати.

Ин

Ирмос: Бог Сый мира, Отец щедрот, * Великаго Совета Твоего Ангела, * мир подавающая, послал еси нам; * тем, Богоразумия к свету наставльшися, * от нощи утреннююще, * славословим Тя, Человеколюбче.

Сниде с горы Иоаким, не скрижали закона приемый, но Юже закон преднаписа и вся пророческая открьша речения — Божию Матерь Чистую, и, играя, вопияше: возвеличися сердце мое.

В ложеснах яко ощути Анна иногда насажденную благоплодную Лозу, из Неяже Грозд процвете зрелый, нам вино бессмертия обильно искапающий, что Ти воздам, благоутробне Господи, вещаше?

Не терпя Иоаким тварь зрети, благочестием неплодствующу, неплодству Аннину преити моляшися и Сию возымети Отроковицу, из Неяже Сын дадеся, вся сыноположивый Своему Отцу, Высочайший.

Песнь 6

Ирмос: Пророка Иону подражая, вопию: * живот мой, Блаже, свободи из тли * и спаси мя, Спасе мира, зовуща: слава Тебе.

Како вмещается во чреве Вместившая Бога? како раждается Христа Родившая плотию? како же сосцами питается, Яже Зиждителя млеко Напоившая?

Мольбу вашу услышав, Бог плодовиит плод ныне дарует вам, всехвальнии Иоакиме и Анно, днесь.

Чистую Голубицу заченши во чреве, радости духовныя исполнися истинно, приносящи песни благодарныя Анна Богу.

Богородичен: Треволнения помыслов, и страстей наведения, и глубина грехов окаянную душу мою обуревают: помози ми, Святая Владычице.

Ин

Ирмос: Из утробы Иону младенца изbleва морской зверь, * якова прият; * в Деву же всельшееся Слово * и плоть приемшее пройде, сохраншее нетленну: * Егоже, бо не пострада исления, * Рождшую сохрани неврежденну.

Закона сени яве переходят: се бо заря Божественныя благодати показуется, Дева облак, из негоже светлое Божества возсияет воистинну Солнце,— Анна, радующися, взываше, Бога Израилева величающи.

Странное, аще и аз зачну, зрение,— яже прежде неплодна и нераждающая, Анна глаголаше, вещающаго Ангела яко услыша, яко отроча родится, и взываше: добре благаго слышания, аще словес сбытие будет.

Горы и холми, поля и море, Ангельское множество и все естество человеческое да веселятся,— Владыки бо Божественный храм, начаток примирения прият Анна, егда ощути себе самую заченшую, вещаше.

Кондак, глас 4.

Подобен: Явился еси днесь:

Празднует днесь вселенная Аннино зачатие, * бывшее от Бога, * ибо та породила паче слова Слово Рождшую.

Икос: Иоаким чудный и Анна Богомудрая, оба живущие во всяком благочестии, по закону Моисееву, неплодни бяху и моляхуся Богу всею душею, глаголюще: Господи Саваоф Преблагий, всяческих надежда, безчадствия болезнь и укоризну веси и печаль, подаждь убо нам плод из чрева, и принесем того в храм Твой — дар священ, и приношение исполнено, паче слова Слово Рождшую.

Песнь 7

Ирмос: Сущим в печи отроком Твоим, Спасе, * не прикоснуса, ниже стужи огонь. * Тогда трие, яко единеми усты, пояху * и благословляху, глаголюще: * благословен Бог отец наших.

Безчадства укоризны убежати моляше Анна всех Владыку, и сея милостивый глас услышав, Того Рождшую, плод подаде той, якоже благоволи.

Царская порфира в твоём чреве исткатися, Анно, начинается, Юже Бог и Царь всех понес, человеком явится и смирит враги, борющия ны.

Миро благовонное во утробе зачала еси, Анно, Миро жизни преестественно восприемшую — Владыку, дыханьи благодати помышления наша облагоухавшаго.

Богородичен: Яко от Троицы Единого Тя, Христе, славим, яко из Девы воплощся, кроме вращения человеческа, вся понесл еси, не отступив Естества Отческаго, Иисусе, аще и соединился еси нам.

Ин

Ирмос: Отроцы, благочестию совоспитани, * злочестиваго веления небрегше, * огненнаго прещения не убояшася, * но, посреди пламене стояще, пояху: * отцев Боже, благословен еси.

Огненосную древле купину, Моисей на Синаи юже виде, Анна зачат во чреве безчадствия, огонь погашающую яко некое злочестие, поющим: отцев Боже, благословен еси.

Капля твоей утробе преславно ныне, Анно, источися, яже Воду Жизни всю внутрь восприяше, орошающую верно Тому зовущия: отцев Боже, благословен еси.

Птенчее яко узре гнездо, вперилася еси духом и молитвою, Голубицу прияла еси нескверну, Сучец, носящую Христа, маслинный, Анно, мысленного потопа нас свободяющий.

Песнь 8

Ирмос: Егоже ужасаются Ангели и вся воинства, * яко Творца и Господа, * пойте, священницы, прославите, отроцы, * благословите, людие, * и превозносите во вся веки.

Давид Юже прорече Царицу, се, во чреве приемлю,— Анна вопияше,— и рожду всех Предстательницу верных, Царя Христа имущую родити.

Земля, в нюже вселися земли Содетель, Скиптр Святой, новый Кивот, Стамна манны в ложеснах матере, Сего Рождшую, начинает прозябати.

Купина неопальная, Свещник златый, одушевленный Чертог Господа Бога, честный Жезл во чреве матере, Сего Рождшую, начинает прозябати.

Богородичен: Возстави лежащего мя во глубине зол, ныне борющия мя победи враги. Узвена безместными сладьми, Благая Чистая, не презри, но ущедри и спаси.

Ин

Ирмос: Чуда преестественнаго * росодательная изобрази пещь образ: * не бо, яже прият, палит юныя, * яко ниже огонь Божества – Девы, * в Нюже вниде утробу. * Тем, воспевающе, воспоем: * да благословит тварь вся Господа * и превозносит во вся веки.

Что ми утробу соделал еси безчадствующу и сосцы сухия, якоже прорекл еси во пророцех, Владыко,— вопияше Анна иногда,— безчадия моего укоризну разреши и даждь ми плод, с нимже вопию: да благословит тварь вся Господа и превозносит во вся веки.

Вниде в твою, Анно, утробу Свещник, Иже Свещу Божественную тайно вмести, просвещающую всяко дыхание сиянии тайными Божественнаго знания. Темже, радуящися, зывала еси: да благословит тварь вся Господа и превозносит во вся веки.

Носят, якоже краснейший ныне сопруг, Божественную Юницу, из Неяже Телец красный возсия, за всех заклавыйся, славный Иоаким и Анна, поюще: да благословит тварь вся Господа и превозносит во вся веки.

Песнь 9

Ирмос: Живоприемный источник приснотекущий, * светоносный светильник благодати, * храм одушевленный, сень пречистую, * Небесе и земли пространнейшую, * Богородицу, вернии, величаем.

Живоприемный Источник зачинающи, Анно Богомудрая, радость ныне приими, Храм святой внутрь во чреве твоём приемлющи, светом правды облистаму, Создателя величающи.

Сопруг честный и преславный, Превечнаго Сына праотцы, закона хранителие известнии бывше, начаток радости рождшии, Иоаким же и Анна почтени да будут.

Юже Даниил Гору великую виде, и Иоиль Землю святую узре, Дверь непроходну, ин же прорече запечатанный Источник и Божественное руно,— Богородицу Деву воспоим.

Богородичен: Порфира, яже руно обagrившая, неизреченнаго Слова воплощения, Кадельница золотая, Трапеза, на нейже Хлеб Христос возложися,— Богородица Дева славится.

Ин

Ирмос: Таинство странное вижу и преславное: * Небо – вертеп; престол Херувимский – Деву; * ясли – вместилище, * в нихже возлеже Невместимый – Христос Бог, * Егоже, воспевающе, величаем.

Ликовствуйте вся души и възграйте: ныне Земля создася, яже плодородит неоранне Клас Жизноносный, от Негоже ядше, не взалчут когда благостыню Того величающии.

Псалтирь с гуслию восприими, Давиде, и песновоспой: се, Кивот явися Божий, Егоже предрекл еси яве будущий в наздание, Имже востахом мы от грехопадения.

Яко величайшия две звезды, изнесосте всесветлую Зарю, Яже возсияет великое Солнце миру. Темже благохвалим и славим вас, Иоакиме и Анно яко Богомудрыя.

Светилен.

Подобен: Свете неизменный:

Свет Рождшая, всю озаряющий тварь, * днесь начинает прозябати Анна неплодными ложесны. * Темже стецемся вси, * ибо прииде избавление осуждения Евина.

Слава, и ныне, тойже.

На хвалитех стихиры на 4, глас 1.

Подобен: Небесных чинов:

Яже прежде человек естество неплодствующее, * яже к Богу надежди, * начаток благочестия, прозябает Деву, * Еюже добрых благоплодие проповедуется, * в зачатии Сея на земли, * приподати пришествию Христову.

Непроходимая дверь Царя Христа, * Яже Божиим советом * в неплодных ложеснах зачатие приемлет. * Ейже, на земли предлагаемей, * возмутся Небесная врата * и земным попустят вход.

Иже прежде век неизреченно * от Бога земным проповеданных * Божественных и страшных таинств * начаток веры явися, * Чистыя и Богоотроковицы зачатие. * Еюже делом тьмы и страстем престати предвозвещает.

Слава, и ныне, глас 8. Малакса:

Приидите, радостно днесь, * всяк чин и возраст человеческий, * со ангельскими лики преславное зачатие Богородицы светло празднуем; * патриарси – всех Царя Матерь; * пророцы – Юже вами проповеданную; * праотцы – Юже от вас Богоматерь; * старцы – Богоотцев; * Богоотцы – Богоотроковицу; * девы – Приснодеву; * вернии – Корень веры; * священницы – всесвященный Храм Божий; *

святых всех лица – Вину собрания вашего; * Ангельская же воинства – рождшую
Владыку всея твари * и Спаса душ наших.

Славословие великое.

По трисвятом тропарь единожды и отпуст.

НА ЛИТУРГИИ

Блаженны от 1-го канона песнь 3-я и от 2-го канона песнь 6-я.

Плод чрева аще подаси мне,— вопияше Анна ко Господу,— возвеличуся и Тебе принесу сей. Сего ради зачинает Чистую Богоматерь. [Дважды.]

Яже по закону скончавши и Богу непорочно работавши, чревоносиши воистинну Законодавца рождшую, Анно всечестная, темже ты, вернии, ублажаем.

В саду молящейся тебе, глас услыша высочайший, Анно Богомудрая, и плод чреву Твоему дает— рая Отверзшую дверь благодатию.

Закона сени яве преходят: се бо заря Божественныя благодати показуется, Дева облак, из негоже светлое Божества возсияет воистинну Солнце,— Анна, радуящися, зываше, Бога Израилева величаючи. [Дважды.]

Слава: Странное, аще и аз зачну, зрение,— яже прежде неплодна и нераждающая, Анна глаголаше, вещающего Ангела яко услыша, яко отроча родится, и зываше: добре благаго слышания, аще словес сбытие будет.

И ныне: Горы и холми, поля и море, Ангельское множество и все естество человеческое да веселятся,— Владыки бо Божественный храм, начаток примирения прият Анна, егда ощути себе самую заченшую, вещаше.

Тропарь, глас 4:

Днесь безчадия узы разрешаются, * Иоакима бо и Анну услышав, Бог * паче надежды родити тем яве обещавает Богоотроковицу, * из Неяже Сам родися Неописанный, Человек быв, * Ангелом повелев вопити Ей: * радуйся, Благодатная, * Господь с Тобою.

Кондак, глас 4.

Празднует днесь вселенная Аннино зачатие, * бывшее от Бога, * ибо та породила паче слова Слово Рождшую.

Прокимен, глас 4: Дивен Бог во святых Своих, * Бог Израилев.

Стих: В церквах благословите Бога:

Апостол к Галатам, зачало 210, от полу.

Братие, не ведуще Бога служите не по естеству сущим богом. Ныне же, познавше Бога, паче же познани бывше от Бога, како возвращаетесь паки на немощныя и худыя стихии, имже паки свыше служити хотите? Дни смотрите, и месяцы, и времена, и лета. Боюся о вас, еда како всеу трудихся в вас. Будите якоже аз, зане и аз, якоже вы, братие, молю вы. Ничимже мене обидете. Весте же, яко за немощь плоти благовестих вам первее. И искушения моего, еже во плоти моей, не уничижисте, ни оплевавсте, но якоже Ангела Божия приясте мя, яко Христа Иисуса.

Аллилуия, глас 1: Спасение праведных от Господа:

Евангелие от Луки, зачало 36.

Рече Господь: никтоже убо светильника вжег, покрывает его сосудом, или под одр подлагает, но на свещник возлагает, да входящие видят свет. Несть бо тайно, еже не явлено будет, ниже утаено, еже не познается и в явление приидет. Блюдитесь убо, како слышите, иже бо имать, дастся ему, и иже аще не имать, и еже мнится имея, возмется от него. Приидоша же к Нему Мати и братия Его, и не можаху беседовати к Нему народа ради. И возвестиша Ему, глаголюще: Мати Твоя и братия Твоя вне стоят, видети Тя хотяще. Он же отвещав рече к ним: мати Моя и братия Моя сии суть, слышащии слово Божие, и творящии е.

Причастен: Радуйтесь, праведнии, о Господе:

СВЯТАЯ ПРАВЕДНАЯ АННА

Святая праведная Анна была младшей дочерью священника Матфана, происходившего из колена Левиина, из рода Ааронова.

Муж ее, святой праведный Иоаким, был родом из колена Иудина, из дома царя Давида. По древнему обетованию из рода Давидова должен был произойти Мессия. Супруги жили в Назарете Галилейском. Ежегодно они отдавали две трети своих доходов на Иерусалимский храм и бедных. По особому Промыслу Божию святая чета до глубокой старости не имела детей. Супруги сильно скорбели об этом, так как бесчадие у евреев считалось тяжким несчастьем и наказанием Божиим. Святые горячо молились о даровании им потомства.

В один из праздников, когда израильтяне приносили в Иерусалимский храм дары Богу, первосвященник, полагая, что бездетный Иоаким не имел благословения Божия, отказался принять их от него. Святой Иоаким был глубоко огорчен. Он обратился к родословной двенадцати колен израильских и удостоверился, что все праведные мужи имели потомство, включая столетнего Авраама. Не возвращаясь домой, святой Иоаким ушел в пустыню и провел там сорок дней в строгом посте и молитве, призывая на себя милосердие Божие и омывая горькими слезами свое бесчестие.

Супруга его, святая Анна считала себя главною виновницею постигшего их горя. Однажды, увидев среди ветвей лаврового дерева гнездо с едва оперившимися птенцами, она слезно молилась о разрешении неплодства и о даровании ей младенца, обещая принести в дар Богу рожденное дитя. Как только святая Анна произнесла слова обета, Ангел Божий возвестил ей об исполнении молитвы и открыл, что у нее родится дочь по имени Мария, через Которую благословятся все племена мира. Обрадованная, святая Анна поспешила в Иерусалимский храм, чтобы возблагодарить Бога и повторить обет о посвящении ему ожидаемого младенца.

С тем же благовестием явился Ангел и святому Иоакиму в пустыне и повелел ему идти в Иерусалим. В Иерусалиме святая праведная Анна зачала Благословенное Чадо и родила Пресвятую Деву Марию.

До трехлетнего возраста Пресвятая Мария жила в доме своих родителей, а затем торжественно была приведена святыми Иоакимом и Анной в храм Господень, где воспитывалась до совершеннолетия.

Вскоре после введения во храм Пресвятой Богородицы 80-летний старец Иоаким скончался. Святая Анна пережила его на два года и отошла ко Господу 79-ти

лет. Преклонный возраст праведных супругов показывает, что рождение у них Дочери было действием особого Промысла Божия.

Церковь называет Иоакима и Анну Богоотцами, ибо они были предками Иисуса Христа по плоти, и ежедневно на отпусте Божественной службы просит их молитв о исходящих из храма верующих.

Праздник Зачатия святой Анны особенно чтится в России женщинами, готовящимися к материнству. Этому празднику посвящено много икон. Одна из них находится в храме святого мученика и страстотерпца Иоанна воина в Москве. На иконе изображена радостная встреча святых и праведных Иоакима и Анны после полученной от Ангела вести о избавлении их от бесплодия.

В конце X века на Святой Афонской горе был построен скит Святой Анны – самый древний из всех Афонских скитов. Опустошаемый в течение многих лет морскими разбойниками, он в XVII веке был восстановлен Константинопольским Патриархом Дионисием, который приобрел у малоазийских христиан стопу святой праведной Анны. В 1680 году там в память успения святой Анны воздвигнут соборный храм. С того времени скит стал носить название «Святой Анны». Он славится на Афоне высокими аскетическими подвигами монахов.

Недалеко от скита Святой Анны находится так называемый Новый скит Рождества Пресвятой Богородицы или «Малая Анна». Близость этих благодатных мест подчеркивает связь священных событий зачатия и рождества Пресвятой Богородицы.